

KALATE OSU PÉTRUS A NGA TILI

Mebatan

(Yak 1 : 1 ; 2 Pét 1 : 1 ; Yuda 1,2)

1 1 Ma Pétrus, nlômane Yésus Krist, m'atili mintobane mintabe mi nga mialan mfa'a ya Pontus, a Galatia, a Kapadôsia, A Asia, a Bitinia, 2 aval ane Zambe Esaa a nga taté yem, a ntelan étyi ya Nsisim, amu mewôk a mmiamane metyi me Yésus krist : Mvam a mvo' é bi kô'ôla'an e be mia.

Vevea Ndinlem

(Mat 13 : 17 ; Rôm 8 : 17, 18 ; 16 : 25, 26 ; 1 Kor 15 : 20-23 ; 2 Kor 4 : 17, 18 ; Ef 2 : 4-8 ; Kol 1 : 5, 12, 13 ; 1 Yôh 3 : 1, 2)

3 Zambe Esaa Nti Yésus krist wongan a bo'o duma, nnye ate, amu beta nkoan éngôngole wé, a nga beta biaé bia mfa'a ya vevea ndinlem amu ñwômane Yésus Krist a nga wômô e miñwuan, 4 na bi nyoñe ngap é ne teke'e bôé, a teke'e mvin, a teke'e viele, nje é ne nnaan e yôb été, 5 mia, amu ngule Zambe, mi ne mba'alan amu mbunan, mfa'a ya nyian ô ne nkômane ya litiban éyoñ j'asu'ulan. 6 Mfa'a ôte mi adañe vak, akôsabo ôyôme nté ya éyoñe ji, mi ayiane tame jibi meve'ele mevale meva, 7 nde mve'elane ya mbunane wônan, ñwô w'adañe gôlt mfa'a ya édima, nnye a jañ akôsa ve'eleban a nduan, w'aye yené jôme ya ékaña'a a étôtok a duma éyoñe Yésus Krist a ye yené : 8 Nnye mi nji tame yen, ve mi anye'e nye ; akôsabo mi nji yene nye éyoñe ji ve mi abuni nye, mi ava'a fe mevak me ne teke'e atoté a ndañan mfa'a ya étôtok. 9 Ane mesondo'o ya mbunane wônan, mi anyoñe nyiane ya minsisime mienan.

10 Mfa'a ya nyiane ôte bekulumejô be nga kulu mvam j'aye bo énjenan, be nga dañe jeñ a kômbô yem ; 11 be nga kômbô yeme môat ate nge éyoñ éte nje Nsisime Krist ô nga too e be be ô nga liti mintáé mi Krist a étôto'o j'aye tôñ. 12 E be be, e nga litibane na, sa mfa'a wop bebien, ve mfa'a wônan, nde be nga bo ésaé ya mam mete, mme mete me maneya kateban e be mia éyoñe ji a ba be nga kate mia mbamba foé a ngule Mfufub Nsisim nnye a nga lômban a so'o e yôp ; mam mete beéngel b'akômbô fombô.

Nloene ya tabe mfufub ényañ

(1 Kor 6 : 20 ; Ef 5 : 1 ; 1 Tés 5 : 8,9 ; Tit 2 : 11-14 ; Behéb 12 : 14 ; Yak 1 : 18 ; 1 Yôh 5 : 1)

13 Ajô ete, tiñeta'ane mesese mengeteñ ya asimesane denan, bo'an éjjin, tela'ane ndinlem jenan ngumba e mvam j'aye so be mia éyoñe Yésus Krist a ye yené. 14 Ane bon be ne mewôk, te boan éfunan a mbia minkômbane ya ndimane ya melu mvus, 15 ve aval ane nyô a nga loene mia a ne étyi, tela'ane miabebien étyi mfa'a ya ényañe jenan ése ; 16 amu e ne nlitane na,

« Mi aye bo étyi, amu me ne étyi. »

17 Amu nge mi aloene nye ane Esaa, nyô atyi'i mô't ase ajô teke'e ngam aval ane mimboane mié mi né, mi wula'an a woñ nté mi too e mintabe mienan : 18 mi yeme' na mi nga kôtéban mfa'a ya bemomoo mezen mi nga kob e be bimvam bienan, sa a biôm bi ajañ ane silba a gôlt, 19 ve bidima metyi me krist, ane ma me mone ntômba a ne teke'e éyem nge aton. 20 Nnye ate a nga tate yemban ôsusua ya mbôndane si nyô, ve a nga litiban e asu'ulane ya biyoñ amu mia. 21 Amu nye mi ntoo bebuni Zambe, nnye a nga wômôlô nye miñwuan, nde a nga ve nye дума, nalé ate mbunane wônan a ndinlem bi aye bo e be Zambe.

22 Eyoñ mi maneya tunu binyiñe bienan a mewô'ô ya benya mejôô amu bebelaa nye'ane bobenyañ, mi tuka'a nye'esan nye'an w'aso e nlem. 23 Mi betaya bialé mimfefé, sa a mvoñ j'ajañ, ve a ngule ya mejô me Zambe, mme me ne vevee a me tôtoo ; 24 amu na,

« Miñsône mise mi ne aval ane bilok,

a étôto'o jab ése aval ane sam bilok,

Bilo'o bi akôt a sam j'akutan, 25 Ve mejô me Nti me too nnôm éto.”

Mejô mete me ne mbamba foé a nga kateban e be mia.

Vevee akok a ayoñ e ne étyi

(Yes 28 : 16 ; Mat 21 : 42-44 ; M.M ; 4 : 11, 12 ; Rôm 9 : 24-26, 30-33 ; Ef 2 : 20-22 ; Yak 1 : 21 ; Nkul 1 : 6)

2 1 Ajô te, va'an abé ése, e fe'e medu'an ése, a mvôl ése, a mesengane mese, a zo' ése. 2 Aval ane minkeñelé mi bon, mi yii mfubane menyañ ya nsisim, nde ete mi aye yaé akui e nyian ; 3 amu mi tye'eya na nti a ne mvam. 4 Za'an e be nye, nnye a ne vevee akok, nde ete e nga beneban e be bôt, ve mfa'a Zambe e ne ntoban a édima; 5 mia fe aval ane bevevee mekok, mi lôñeba'an ane mi aye bo miabebien nda ya nsisim, mi bo mfubane nda beprêtre, mfa'a ya ve mimfufube metuna'a Zambe a kañese amu Yésus krist. 6 Amu e tele ntilane na :

« O lôô, m'abôôé akok e sion,

ntoban a édima ako'o ya abuk,

nde nyô a buni nye a ye bo te veban ôson.”

7 Ajô ete mfa'a mia bôt mi abuni, e ne édima jôm: ve mfa'a avale bôt e ne te buni,

« Ako'o ebien belôñ be nga ben,

Nde ete e nga boban nlô ako'o ya abuk;

8 Ako'o d'aye bo na bôt be kolé ôbak,

Ako'o d'aye bo na be ku;”

b'aye kolé ôbak amu b'abo mejô mete melo; mfa' ôte fe be nga téléban.

Rev. Matthias MEYE
Secrétaire Général 1961.....

9 Ve mi ne ntoban ayoñ, beprêtre ya nda njôô, mfufub ayoñ, bôt be Zambe émien a bili, nde mi aye liti bitôto'ô bi mame ya nyô a nga loene mia mi kôlô e dibi a ke vôm étua éfufube jé é né. 10 Mi mbe teke'e bôt e melu mvus, ve éyoñe ji mi ntoo bôte be Zambe; melu mvus mi nji ke nyoñe nkoan éngôngol, ve éyoñe ji mi nyoñeya nkoan éngôngo.

Nyiñan ane bebobisaé be Zambe

(Mat 5: 11, 16; Rôm 13 : 1-8; Ef 4:1)

11 A bôt m'anye'e, m'aye'elane mia na, ane bejin a mintabe, mi tyi mbia mikômbane ya minsôn, mmie mi aluman a ényiñe nsisim. 12 Mi wulu'u ane d'ayian e vôm bikul bi too; nde , vôm b'akobô mia abé ane beboabé, be viane yene mbamba mimboane mienan, b'aye ve Zambe дума môse ya njoman.

13 Mi su'ane miabebiene si e be ejôé ése ya bôt é ne ntelan amu Nti, to'ona a ne njô bôt a ne ntelan ôsu, 14 ja'ana be ne bengovina émien a lôme na be lebe beboabé, a na be kañe ba b'abo mvaé. 15 Amu e ne nkômbane Zambe na, éyoñ mi abo zôsôô mi aye kpwee ndimane mekute me bôt bivô. 16 Nyiñan ane beti, ve te belan éto beti jenan ane ébuta'a ya bo abé ; ve nyiñan ane bebobisaé be Zambe. 17 Sema'ane bôte bese, nyeka'ane bobenyôñ. Koane Zambe woñ; sema'ane njô bôt.

Eve'ela'a ñwuane mintaé Krist

(Yes 53: 3-12; Mat 16: 24; Ef 6: 5-8; Tit 2: 9, 10; 1 Pét 3: 14-18)

18 A bebobisaén su'ane miabebiene si e be beti benan a ésemen ése, sa ve ba be ne mvo'é a évôvoé étam, ve fe ba be ne ékotekot. 19 Amu dina e ne jame ya mvam, nge amu ajô Zambe, môt a ye jibi bikpwe'ele te étom. 20 Amu mfi jé ô ne été, na éyoñ mi abo abé mi aye jibi na be bôme mia ? Ve éyoñ mi abo zôsô b'aviane ndeñele mia, jiba'an, dina e ne mvame Zambe. 21 Amu mfa'a ôte mi nga loban, amu Krist fe a nga jibi mintaé amu ajô denan, a lí'i mia éve'ela'a nde mi aye tôñe bibô'a mebo bié : 22 nnye ate a nga bo te bo abé ; medu'an me nji ke yené anyu dé. 23 Eyoñ a nga kpwe'eleban , a nji ke bulan ékpwe'ele ; éyoñ a nga tôban ékpwe'ele, a nji ke sise môt ; ve a nga buni nyô a tyi'i ntyi'an ô ne zôsôô. 24 Emien a nga be'e mam abé mangan e nyôle jé élé yôp, nde ete bi aye wu mfa'a ya abé, a nyiñ mfa'a ya zôsôô. Mi nga saéban amu meveñe mé. 25 Amu mi nga dimi fé ane mintômba, ve éyoñe ji mi bulaneya e be Nnonô a mba'ale minsisime mienan.

Beyal a beyôm

(Ef 5 : 22-33 ; Kol 3 : 18, 19 ; 1 Tim 2: 9-15)

3 1 Aval ete fe mia beya , mi su'ane miabebien si e be benyô beyôm, amu bevok, akôsabo na be ne te bo mejô mete mewôk, be ne ngule ya dutuban teke nkobô, amu ényiñe beyale bap. 2 Eyoñ b'ayen éjijin a mfuban ényiñe wônán. 3 Mi bo'ô te bo nyanga ya atan a mfenan ési, mbe'ane gôlt a njaane bizingi; 4 ve mi bo'ô minsolane mi bôte ya nlem a metabé me ne te ja ntuk, ma ya nsisim ô ne nje'eban a évôvoé, ñwô ô ne beta tañ e mise me Zambe. 5 Aval ete mimfufub mi binga ya melu mvus mi nga buni Zambe mi nga kômesane mibien, a suubane si e be beyôme bap, 6 aval ane Sara a nga ve Abraham mewôk, a loene nye nti wé. Mi ne bone bé éyoñe ji nge mi abo zôsôô, teke'e jam d'ayiane ve mia woñ.

7 Aval ete fe mia beyôm, mi taba'ane benyô beyal aval ane ñyemane ya été ô né, mi sem'é minga aval ane nyô a ne êkôma'a j'adañ atek, amu mi ne beébe benyoñe ngabe mvame ya ényañ, nde ete meye'elane menan m'aye bo te te'elan.

Njibane mintaé amu zôsô

(Besam 34: 13-18; Mat 10: 24-31; Rom 12: 14-21; 1 Pét 2: 12, 19, 20)

8 M'asu'ulane jô na, mia bese, bo'ane fe'e jia, mi wô'ane mintaé, mi biane nye'ane bobenyañ, mvam minlem, nje'ebane minlem. 9 Te butan abé baa abé, nge mbia nkobô a mbia nkobô ; ve mi vianane botan, amu mfa'a ya jame di mi nga loban, nalé mi aye nyoñ ébotan. 10 Amu na,

“ Nyô a kômbô nye'e ényañ,

na a yene mbamba melu,

a kame' ôyeme vié mfa'a ya abé,

A biyaé bié mfa'a ya kobô medu'an;

11 A sa'ale' abé, a bo zôsô;

A jeñe mvo'é a tôñe je.

12 Amu mise me Nti me lôô bezôsôô,

Nde fe melo mé me yoo e meye'elane map.

Ve asu Nti d'asiñe ba b'abo abé. »

13 Nde za a ye ndamane mia nge mi ave ngule ya bo zôsôô ? 14 Ve ja'ana mi ajibi mintaé amu zôsôô, mvom a mia. Te koane be woñ, nalé fe te fô'ôban, 15 ve mi tela'ane Krist étyi e minleme mienan été ane Nti. Melu mese mi taba'ane nkômesane ya kate nyô ase a sili na mi kate nye ajô ya ndinlem é ne e be mia, ve mi bo'o nalé a nje'ebane nlem a woñ. 16 Mi bii ntyiña nlem jenan mvo'é, nde vôm mi atotaban abé, ba b'akpwe'ele mbamba ényañe wônane ya be Krist b'aye veban ôsone nyô. 17 Amu d'adañe mvaé na mi jibi mintaé amu mboane mvaé, nge nalé a ne bo nkômbane Zambe, sa amu mboan abé. 18 Amu Krist a nga jibi awu éyoñe jia mfa'a ya bise amu mam abé, zôsôa mô't mfa'a bikotekote bi bôt, nde a ye zuu bia e be Zambe, a nga wôéban e minsôn, ve a nga nyiiban mfa'a ya nsisim : 19 a ñwô ôte fe a nga ke kate minsisim mi to mimbô'ô foé, 20 mmie mite mi nga bo melo melu mvus, éyoñe njibane Zambe ô nga yage e melu me Nôa, éyoñ arka a nga bo a lôñeba'an, nnye ate tyôtyoé bôt, nalé a ne na, bôte muam, be nga nyiiban e mendim. 21 Mbaptisô w'ave'an a jame di ñwô w'anyii mia éyoñe ji, sa aval ane mvaane Yésus krist, 22 nnye a nga ke e yôp, a ntoo fe mbonnôma Zambe, baa beéngel a biwôlô a mingugul mi ne e éjôé jé été.

Rev. Matthias MEYE

Mbamba beba'ale be mvame Zambe

Secrétaire Général 1961.....

(Rôm 6: 6-13; Ef 4: 17-24; 1 Pét 3: 18)

4 1 Ajô te nde, amu Krist a nga jibi mintáé mfa'a ya minsôn, jala'ane miabebien a aval ôsimesan ôte ébien, amu nyô ase a nga jibi mintáé mfa'a ya minsôn, a maneya wo'an a abé, 2 ane a ye bo te tabe melu m'asu'ulan mfa'a ya minsôn, a beta'a bo mbia minkômbane mi bôt, ve nkômbane Zambe. 3 Amu biyoñ bi lôteya bi yianeya mfa'a ya bo mam bikul bi anye'e bi bo'ok, a wulu e mbia bisô'ô été, mbia minkômban, nso'ane bilam, njemane mbia mebôk, mbia bisulan ya di a nyu, nkañaé biyeñeyeña bi biôm. 4 B'ayene de éye'ane jam aval ane mi ne te fulan a be éyoñe ji mfa'a ya avale ndôn ete ya nzametane mam, nde b'aviane mia kpwe'ele : 5 nde b'aye yalane nyô a ne nkômane ya tyi'i bevevee a miñwuane mejô. 6 Amu ajô te nde mbamaba foé a nga kateban ja'ana e be miñwuan, nde akôsabo be nga tyi'iban mejô mfa'a ya minsôn ane bôt, ve be too ane Zambe mfa'a ya nsisim.

7 Ve asu'ulan ya mam mese e ntoo bebé : ajô ete, bo'an fek a éjijin mfa'a ya meye'elane menan. 8 Jame ye ôsu mfa'a ya mam mete mese, miabebien nye'esa'ane ngu, te ke kat ; amu nye'ane w'abuti jama mbia be mam : 9 mi bo'an anyep, wua a bo'o nyô mbok te ke minsok. 10 Aval ane mô't ase a nga veban mvean éziñ, a bela'ane wô mfa'a ya volô miabebien, aval ane mbamba beba'ale be mvame Zambe nje é ne mevale meva; 11 nge mô't éziñ a kobô, a kobô'ô ane nyô a tote minjôane mi Zambe ; nge mô't éziñ a volô bôt, a volô'ô aval ane ngul Zambe a ve ; nde Zambe a ye wum mfa'a ya mam mese amu Yésus Krist, E be nye дума a ndañan bi ne émbié nnôm éto a nnôm éto. Amen.

Njibane mintáé ane kristen

(Mat 5 : 10-12 ; M . M. 5 : 41 ; 14 : 22 ; 2 Tés 1 : 4-12)

12 A bôt m'anye'e, te vemban a meve'ele me nduan m'azu e be mia na, me ve'ele mia, aval ane ane nge me ne éye'ane jam é boya be mia. 13 Ve va'an, amu mi ne benyoñe ngabe ya mintáé mi Krist ; nde éyoñ étôto'o jé j'aye yené, mia fe mi aye va'a beta mva'an. 14 Nge b'akpwe'ele mia amu jôé Krist, mi ne mvom ; amu Nsisime ya étôtok a Nsisime Zambe ô too e be mia. 15 Ve mô't ya be mia a bo'o te jibi mintáé ane ñwôé bôt, nge ane ñwuwup, nge ane mboabé, nge ane mô't asum ; 16 ve nge mô't éziñ a jibi mintáé ane Kristen, a bo'o te wô' ôson ; ve a va'a Zambe дума a jôé ete. 17 Amu éyoñe ya ntyi'ane mejô ô zuya taté mfa'a ya nda Zambe : a nge j'ataté e be bia, asu'ulane ya ba be ne te bo mbamba foé Zambe mewôk d'aye bo aya ?

18 Nde,

« Nge zôsôa mô't a nyiiban e tyian,

Mô't a ne te ko Zambe woñ a mboabé b'aye tebe vé ? »

19 Ajô ete, ba b'ajibi mintáé ane nkômbane Zambe ô né, b'abo mvaé, be va'a minsisime miab e be Nti a ne nyô ya buni.

Mba'alane mbam mintômba Zambe

(M.M. 20 : 28 ; 2 Kor 4 : 2, 5 ; 1 Tim 3 : 1-7 ; 4 : 12)

5 1 Ajô ete , m'alebe bemvendé be bôt be ne e be mia nalé, ane ébemvendé, a nkañete mintáé mi Krist, ane fe nyô a ne fe nyoñe ngabe ya étôto'o j'aye yené: 2 Mi ba'ale'e mbam mintômba Zambe ô ne e be mia, a bo ésaé ya fombô , sa a ntindan, ve a nkômban, sa fe amu mvine nyoñane akum, ve mbamba nlem; 3 sa a mboane ya ndomisi,

Rev. Matthias MEYE
Secrétaire Général 1961

ve mi bo'ane miabebien bive'ela'a ya mbam. 4 A éyoñ beta Mba'ale mintômba a ye yené, mi aye nyoñ ékate duma, nje é ne te viele.

5 Aval ete, mia bendôman, bo'ane bemvendé be bôt mewôk. Mia bese, jaéane nje'ebane nlem ane ases, ane mi aye volan,

« amu Zambe a wosan bôt be ne mebun, ve a mvamane ba b'asuu bebien e si. »

6 Ajô ete, su'ane miabebien si e éwôlô wo Zambe, ndemben a ye bete mia yôp eyoñ j'ayian ; 7 va'ane nye mam me ôsame menan mese, amu nye a simesane mia.

8 Mi taba'ane nkôman, mi momba'an, Nziziñe wônan diable w'amone mia mbôma'ane ane ñbweñbwem j'amemele, a jeñe môt éziñ ya lalé. 9 Mi wosa'ane nye, mi tebe ngul e mbunane wônane été, mi yeme na, avale mintaté été e kuiya e be bobenyoñ benan be too e si nyô. 10 A Zambe a ne mvam ése, nyô a nga loene mia na, mi zu vôm étôto'o jé ya nnôm éto é ne e be Krist, éyoñ mi maneya jibi mintaté ôyôme nté, émien a ye sondô kôme mia, a yemete mia, a ve mia ngu. 11 Ngule ya jôô é bo'o e be nye nnôm éto a nnôm éto. Amen.

Mebatan m'asu'ulan

(2 Kor 13:12, 13; 1 Tés 5: 23-28)

12 A Silvanus, nyô a ne mojañ m'abuni, ane me lôô nye, me maneya tili mia mejô tyôtyoé, ntilane ya leb, me jô'ô na, nyina nje é ne bebela mvame Zambe : mi teba'ane été ngu . 13 Nyô a ne Babilôn, nnye a ne fe ntoban, a lôme mia mebatan ; nalé ate fe mone wom Markus. 14 Mi bata'an, wua nyô mbok a nlatane menyu ya nye'an.

Mvo'é é tabe'e be mia bese mi ne e be Krist.

Rev. Matthias MEYE
Secrétaire Général 1961.....